

通譯僅習文意所學粗淺措辭鄙陋且不能盡悉表箋體制以致言詞輕薄何敢故為戲侮以生釁端天日照臨實非誣妄幸蒙聖慈不即問罪寬宥之恩昊天罔極知感且愧糜粉難報今照進賀洪武二十九年正朝表文係成均大司成鄭擢修撰賀東宮箋文係判典校寺事金若恒修撰為緣鄭擢見患風疾病證不能動履難以起遣除已欽依差通事郭海隆管送撰文人金若恒赴京伏取聖裁○命賑慶尚道飢○命都堂曰新都赴役之民待今月晦日盡放歸農○丙午駕發松京○丁未縱火于壽義原觀獵○戊申東南赤氣○庚戌上與顯妃至自留後司○佛頭骨捨利菩薩提樹葉經舊在通度寺因倭寇移置留後司松林寺遣人取來○遣成均大司成咸傳霖往諭金若恒于義州若曰非不惜汝重違朝命解送汝其善辭以對毋敢有失若恒聞命曰敢不盡心丙寅若恒將涉鴨江謂傳霖曰願王親君子遠小人修明政刑勵精圖治勿以臣之死生為慮臣欲為國亡身久矣幸以臣言達於王前言訖而